

# Jubilaren-Ehrung (mit Mathematik)

für Heini Hafner, Sängerbund Elgg

Delegiertenversammlung am 26. März 2011 in Elgg

Autor: Roland Büchli

De Heini wird hüt als Xangs-Jubilar  
Mit eusem Vereinsfahne g'ehrt. Und debii  
Weiss no lang nid enjede was i all dene Jahr -  
Mathematisch xee - isch xii:

I 25 Jahr à im Schnitt 40 Probe  
Machs über 1000 Probe mit.  
Pro Prob werded im Schnitt 6 Lieder xunge,  
Macht 6000 Lieder i de ganze Zit.

I de Prob wird vill gschnöred,  
chunsch mängisch nid wiit,  
Chunsch aber doch öpe 20 Minute zum Singe.  
Pro Minute singsch 150 Note im Schnitt,  
Pro Prob also müend 3000 Note glinge.

Aa gno, singsch jedi 40igschti Note nid schön,  
falsch, gar nid, oder z'churz, oder z'lang  
So git das pro Prob grad mal 75 Tön  
wo nüüt biitraged zum bessere Klang.

Rächnisch das ue, uf Tuusig Probe  
chunsch uf 75 Tuusig falschi Tön!  
und wüsch die alli a eim Schtuck singe  
Gäbs es achtschtündigs Lied,  
und es tönti nid schön!

Das *Misston-Kontingänt*, womer jedem Sänger  
im Lauf vo de Jahr mössti zuegestoh,  
hät de Heini, mit sinere schöne Schtimm,  
chum jemals in Aaschpruch gno.

Er hät de Ton fascht immer troffe.  
Segs als Solischt, Chlaus oder Liedkommissär  
Als Reschissör, Fähnrich oder Chronischt  
hät er gwürkt und würkt hüt na, so isch eben Er.

„Morn träge mer, achtung, alli guet lose:  
Er wisses, langgermlets Hämp – wien ich!  
Dänn die **gääli** Gravatte und **schwarzi** Hose!  
Franz, häschs au ghört? Das gilt au für Dich!“

So oder ähnlich hät er chöne rede  
wänn er öpis hät welle dure z'zieh.  
Gern gha hät das nid immer enjede,  
Aber so eine bruuchts, ich chönt das nie!

Sini Solouftritt, sägi eu, sind wunderbar!  
und jede, wos xee hät, isch nachher en Fän  
Dänn öb als Sänger oder Operettestar:  
De Heini isch en richtige Supermän.

Sit Neuschem chasch en, je länger je meh,  
i Castings aaträffe, wies hüt ebe so gaht.  
Aber ihn als Gröschts Schwiizertalent na z'xee,  
Da dezue isch es etz leider scho z'schpat.

**Heini zuggewandt:**

Heini,

Mir wünsched, Du bliibisch na lang im Chor  
Dänn mir bued witer uf dis grosse Talänt  
Wänd hoffe, Du ziechisch eus all anderne vor  
Und wänn's Di z'Züri im Schauspielhuus wänd!

Ich tank' der für dies villsiitige Wirke  
Im Rahme vo üsere Sängerschaar  
Und wünsch' der im Name vo allne Kollege  
Na vill Freud am Singe -

für die nöchschte 50 Jahr.